

四庫全書

集部

欽定四庫全書

惟實集卷六

元 劉鶚 撰

七言古

四月十三書所見

天厯二載春客燕河清海晏消戈鋌上林四月風日妍  
乘輿思樂遊龍船鳳輦並駕花雲駢騎麟翳鳳驟羣仙  
鸞旂屬車相後先牙檣錦纜相蟬聯萬馬襍還蒙錦韉

千官扈從控紫弦和風不動舟徐牽瓊童玉女歌采蓮  
黃門傳宣奏鈞天龍伯國人夜不眠金支翠旂千花鈿  
光怪出沒明遙川紅雲翠霧覆錦筵青鳥飛去當帝前  
珍羞玉食羅紛駢馳峯駱乳繁馨鮮御爐紫烟浮龍涎  
金甌璫液凝醴泉才人歌舞爭取憐南金蜀錦輕棄捐  
龍顏一笑春八埏臣子拜舞呼萬年嗚呼吾皇聖智軼  
漢宣但恨子虛之賦無一能為君王傳

醉歌

常聞有客卑當時我謂客語更過之及今更事匪客過  
往往亦足卑當時胸中愴惶失所主忽為虎兮忽為鼠  
昨朝蝴蝶今不飛舊日衣冠為誰舞令人覩此中心哀  
飄然欲賦歸去來山中酒熟花正開人間久無燕昭臺

題甯戚叩角圖

丈夫有志凌青雲時窮偶與蓬蒿羣牽衣飯牛豈所樂  
一飯不敢忘吾君雪花光芒歲將晏叩角長歌發悲歎  
草園窮笠不禁寒長夜漫漫幾時旦嗟我齊桓真好賢

拔之牛口行青天君臣慶會勲業異十年汗簡猶流傳  
食黃瓜二章章五句

燕山五月新嘗瓜淺黃深碧風韻佳食之颼颼清齒牙  
時來微物亦薦達使我撫髀長咨嗟

却憶去年之來時天風搖蕩黃花期回首歲月如雲馳  
人生斗酒即行樂功名竹帛將何為

嶺南即事

昨朝炎風今日雨今日濃雲昨朝暑陰晴寒暑片時間

到此令人信難處矧今世事多舛訛晴日常少陰常多  
隨宜料理強排遣天運若此將如何

題東山高卧圖

君不見今將官徒知學公攜妓遊東山一朝傳聞賊至  
關匹馬遠竄不復還又不見桓司馬秦苻堅叛逆之氣  
凌雲烟惟公胸中兵甲全成功談笑神怡然嗟哉方今  
羣盜等螻蟻之子見公應愧死

子卿持節圖

龍沙茫茫雪如雨大窖雪寒羝不乳孤臣持節十九年  
忍死不降思報主方今世事紛如雨同安虎頭真忠臣  
江州太守骨已朽尚書却作洪都守感時撫卷雪漫空  
為弔忠魂酌尊酒

題禮部尚書巖子山

神仙亦時有公子閒時無公子世豈無不如公讀書神  
情俊朗自仙骨清淑之氣鍾扶輿娟娟夜月明瑤瑜燦  
燦秋水涵芙蕖既不愛臂鷹逐兔馳飛兔又不喜楊花

撲帳斟流酥心之所樂者左置史右列圖筆牀茶竈勝  
具俱衣冠文物來羣儒清宵管絃罷歌舞白晝翰墨供  
歡娛列職於春官復能以禮樂致主於唐虞主上眷顧  
桓渠渠功臣世胄有如此風雨喬木清敷腴公子可謂  
間世無且聞有巖山乃是公所居清泉白石日輝潔幽  
花野草春扶疎山中桃李亦仙品風月迴與人間殊公  
猶神仙山蓬壺惟公與山聞京都蹇子抱大拙來此亦  
已久既不能彈鋏干田文又不能學求齊以吹竽世尚



誇詐吾迂濶吾篤信義人浮虛鑿圓枘方齟齬不相入  
旦夕惟有食破硯邇來冰凍硯亦枯然亦甘崎嶇樂此  
無怨吁進退必以正求為聖人徒聞公高誼歷千古所  
以願曳侯門裾其足非趙趙其口非囁嚅其詩非狂亦  
非諛嘗聞昌黎言以為古來王公布衣前後常相須乃  
可千載垂名譽吾意若此公躊躇遇與不遇天何如

歸來乎

歸來乎丈夫既不能如田千秋一言悟主生封侯又不

能如主父偃奏書直上黃金殿君臣千載遇合難飯牛  
長夜何漫漫胡為久客衆公間進退俯仰多覲顏歸來  
乎孟嘗君不可作平原君骨亦枯買絲欲繡空糝糊通  
來卿相不好儒客且無履安得珠雖云二子未盡道尚  
能與客相傾倒白玉樓空燕不飛黃金臺圯生秋草歸  
來乎京師不可以久留歲晚霜雪侵貂裘山中風月如  
清流醉餘菊花簪滿頭千秋奚足顧主父焉能儔歸來  
乎先人有書今尚存青燈夜雨當細論孰云落落苦難

合有志可致乎青雲他年歲君在癸酉看花爛醉瓊林  
酒

附翰苑羣公和韻

歸來乎未可歸吾聞志士常思秋亦欲為相為公侯  
歸來乎未可歸放牛歸馬武初偃奎章閣近通明殿  
時來金印信不難乘風寧患海水漫騎麟翳鳳紅雲  
間玉階咫尺瞻天顏歸來乎未可歸有硯尚未枯有  
墨雲模糊天子明聖方崇儒貴士價若驪龍珠士當

報主志行道扶持莫遣戈輕倒昌黎束書三十年刻  
苦成名非草草歸來乎未可歸姑少畱幸有季子之  
狐裘公庭對策如奔流快意亦可持鰲頭烟霞泉石  
豈足友深山鹿豕非吾儔歸來乎未可歸我古今尚  
存唐虞要與吾君論綱維人倫正臣妾剗剔讒蠹驅  
氛雲大明當天未遇酉薰陶和氣濃於酒

羣公見和又荅四首

歸來乎蟪蛄生不知春秋變滅頃刻猶王侯歸來乎五

陵草木盡披偃昨日秋螢滿梁殿廢興反掌元非難海  
水清淺塵瀾漫吾寧終老青山間猿吟鶴唳聊醒顏歸  
來乎喚童子治我圃無使霜後菜本枯禦寒更遣牕重  
糊從教壯士嗤為儒我價自若照乘珠文章烏足存古  
道底用詞源三峽倒功名已付雨中花意思要同牕外  
草歸來乎常笑張子房崎嶇願封留何如大澤披羊裘  
忘機傲兀臨溪流富貴不足回其頭高風千載誰當儔  
歸來乎故園之菊今應存此事欲與淵明論孤松獨撫

倦飛鳥出岫雅愛無心雲明當秋風月在酉杭稌初黃  
催釀酒

歸來乎古來聖人作春秋始尊王室嚴諸侯一辭初不  
待商偃歸然古道靈光殿網維名教世所難初非鑿空  
凌漈漫二百四十餘年間亂臣賊子俱汗顏歸來乎後  
世多不然吾道秋葉枯紙扇一破難再糊種瓜冬實欺  
羣儒魏王反謂齊無珠紛紛似此不忍道冠屨衣裳盡  
顛倒蘇秦六國相金印園綺商嶺飯芝草歸來乎不可

留山中木鱗正堪裘乘槎鼓柁湘江流直欲下至滄海  
頭白衣蒼狗紛百變蛇神牛鬼寧堪儔歸來乎將安歸  
師之所存古今得喪奚須論有口不飲貪泉水有眼但  
看南山雲塵埃風雨郊復酉千載虛名一盃酒

歸來乎生不必八千秋爵不必萬戶侯飲河得如鼠之  
偃買花種作芙蓉殿世途荆棘進取難何況風雨長漫  
漫甘心局促筆硯間時於樂處尋孔顏歸來乎山中喬  
木冬不枯山前春到花模糊臘脂梅綻酸於儒黃金橘

熟圓如珠四時好景難具道有客叩門屣顛倒醉餘吟  
詩弄明月醉後從仙拾瑤草歸來乎客勿去客少留尊  
空尚堪脫鸛裘但願有酒如川流長使吏部眠甕頭山  
花野鳥自歌舞樵童牧豎相朋儔歸來乎四海故人今  
幾存心事落落誰相論邇來賴有揭閣老亦解為我歌  
浮雲人生幾何鐘報四行樂舒心聊寓酒

歸來乎我生今踰四十秋始悔識字求封侯少年意氣  
極驕偃謂當平步金鑾殿那知命舛百事難繭生兩



足沙漫漫有時或墮荆棘間努力自奮終強顏歸來乎  
君不見功成一將萬骨枯髑髏之血猶糝糊弓藏鳥盡  
殺韓信幾敗公事罵豎儒笑揮珊瑚示侈靡豈意奴輩  
便吾珠誅夷封籍可勝道北風吹山山欲倒平泉木石  
又誰家金谷樓臺半芳草歸來乎故家猿鶴遮我留布  
袍暖勝貂鼠裘巾車乘興尋絕壑展席隨意臨長流周  
旋世事但點頭高節每慕晉宋儔歸來乎及早歸生涯  
雖薄今尚存堯舜不必吾儕論攜書穩讀牛背日領鶴

閒種芝田雲作勞暮歸正當四擊缶嗚嗚呼斗酒

天池魚

君不見萬歲山下天池中鱣魴赤鯉森蟻蜂荷陰柳影  
護深碧揚髻鼓鬣何憧憧思波浩蕩得所托異日或可  
隨雲龍乘輿北狩未及遠魚已就戮遭羣兇公然白日  
恣竊盜得錢聊復斗酒供聖恩自謂守禦固豈知守者  
元非忠羣鮮無知固可負忍負主意將為容又不見蒼  
生與魚正相似託身天池尚如此

至正甲申歲大饑民多艱食殍死者相望盜賊擾  
擾子亦缺食未免作粥以延殘喘因賦食粥歌  
以暢此懷

朝餐一頓粥暮餐一頓飯每當食粥時未免一長歎少  
年何事不相遭胡為晚歲方論交此時菜蕨各已盡以  
糟配爾為嘉穀既啖糟復食粥却意年當三十六笑攜  
省檄上皇州曾以文章動流俗二程祠宇陋且卑我奮  
赤手更掣之至今穹碑照淮水碑成秋滿遊京師京師

嬉遊二十載鐵石忍窮心有在聲名歎起鳳凰池風雲  
已際魚龍海當時結交多貴人往往尊我席上珍執經  
或在弟子列或遣弟子來相親劇談王道尊禮樂每激  
薄俗敦彝倫問閭疾苦詳敷陳亦或一慨眉為顰有時  
華筵湖山下爭挽先生共陶寫滿堂座客盡豪貴亦知  
推讓宗儒雅盈盈珍饈簇金盤袞袞葡萄浮玉斝金釵  
十二列兩行班班初匪尋常者主人行盃極歡笑競唱  
新詞誇艷冶半酣相惱索題詩揮毫寫向香羅帕尊前

為我發新聲自以風流望鄙野萬錢日食固有限一笑  
千金絕無價放懷滿飲鸚鵡盃何心復戀麒麟畫鸚鵡  
舞罷月欲上半掩城門歸並馬等閒高會難具論酒酣  
掉臂金馬門三三五五正少年乘興共我歌浮雲窮冬  
出使居庸北駸馬穩步龍沙雪清霜在鬢冰在鬢指凍  
欲墮饑欲裂苦寒不透貂鼠裘青鼠煖帽方蒙頭瑤田  
玉界中著我自是奇士真壯遊解鞍沽酒彈箜篌打手  
刺刺歌鳴謳丈夫有志在許國我自樂此忘羈愁連檣

海運三百萬署黔楮尾方成卷每憂談笑誤王事朝夕  
驅馳敢忘勸湖廣文臺正乏賢諸公為買江南船漢陽  
春樹晴歷歷秦樓夜月明娟娟手提文印不半年首為  
鄂學歸侵田蓬山有詔歸朝天錦袍公子偕神仙宣文  
閣靜萬機暇時遣中官催進畫飽聆天語近天光神揖  
天香更瀟灑壯遊既倦思還家竭來庾嶺觀梅花桑麻  
絃誦各得所玉堂召我天之涯平生所歷猶在眼夜半  
思之皆夢幻盛時不敢忘貧賤自喜枯腸藜藿慣飽食

粥無咨嗟爾糟爾粥甘如飴鷄鳴曳履東家誰蕪婁曾  
療王孫饑粥兮粥兮敢爾卻猶勝蕨餐滋味惡苟延殘  
喘待秋成白髮春風會如昨

關武行

關西頡洞風塵起諸將陳兵耀威武願言下教壯軍心  
攬衣下馬東門去盈盈野水抱城郭莽莽寒蕪翳沙渚  
沙場築臺高十丈玉節光臨有攸止微風不動碧油幢  
暗塵輕拂銀交椅當軒下馬一寓目雲鳥魚麗俱得所

帳前駿馬矯如龍  
帳下健兒猛如虎  
五方牙旂按五色  
戈戟如林分部伍  
臺前獨建大將旗  
雲散天清日當午  
寶刀一揮牛首落  
血祭旌旄洒紅雨  
命官奏喜得吉卜  
士卒喧呼發金鼓  
曠懷浩蕩納乾坤  
老氣蒼鬱生雲霧  
祭餘分胙各有序  
旨酒盈樽肉登俎  
酒邊好語相激昂  
世事艱危思共濟  
同舟慎勿異秦越  
四海相看總兄弟  
願無爭氣與爭功  
要在相歡勿相妬  
上下心同鐵石堅  
城池勢若金湯固  
黃河如帶山若礪  
當保初心與初誓



我言剴切因流涕忠義推之人肺腑三軍感激各再拜  
願效驅馳報明主酒酣踞請獻所長萬馬爭馳置脫兔  
舞劍劃若掣電驚揚旗歛見飛星度止齊不愆六七代  
練習初非朝夕故花奴技癢爭角逐千盾紛紛向人舞  
將軍一笑挽強弓百步穿楊駭相顧固知蒙恬勇無敵  
尤信張良素多智成都底用說花卿安西不復歌都護  
曲江江頭多壯士官陂小賊奚足數會當飛度虎頭城  
為弔英雄死何苦生擒賊奴剖心血洒向忠臣墳上土

功成掃歸獻天子竹帛勲名耀千古

通集賢全大學士

枯桑昨夜生滄溟風雨擾擾晦復晴功臣子孫半零落  
惟公獨克承家聲金蓮坐擁晚出院兒童走卒俱知名  
天球河圖不篆刻金鐘玉鏞殊鏗鉤汪汪萬頃那可測  
撓亦不濁澄不清古今事物貫宵次乾坤風月皆性情  
邇來有幸亦再覩使我鄙吝不復萌始知將相真有種  
往往山岳鍾英靈自憐片影雖伶仃不願恩叨一顧榮

霏霏議論玉雪冰但願容我時來聽

七言律

元日

天門蕩蕩開黃道丹陛雍雍肅曉班御氣擁雲蟠鳳闕  
春風隨酒上龍顏君臣慶會賡歌際禮樂昇平揖讓間  
四海朝元無一事華封但祝壽如山

曉起

休官彭澤真忘世捧檄廬江喜為親薦福自緣渠薄命

築臺敢謂世無人但明一藝俱登仕獨擁羣書不療貧  
竿瑟相違每如此且須珍重百年身

鐵馬

伊誰巧鑄渥洼姿簷外鉞鏦一線羈帶甲有聲如擊刺  
憑鞍無力任驅馳湘妃環珮天風急蜀道霖鈴夜雨悲  
漫爾哀鳴求一顧奈何鈍質本無奇

盆池

池中地窄一泓多滿注流泉復幾何皓月初圓先得影

微風雖動了無波可容積鯉十數輩僅種圓荷三兩窠  
兀坐小牕炯相對眼明時見白雲過

苦雨獨坐有感

白黑賢愚混是非詼諧調笑足投機平原具眼猶輕遂  
延賞何人解識韋紅杏碧桃應懶種孤雲野鶴自高飛  
世間處處魚羹飯好及秋涼早賦歸

彭澤

江漢朝宗第一門擎天老樹碧璘珣乾坤設此寧無意

鬼物因之遂有神一曲湖山知幾劫千年風致屬何人  
淵明老矣遺祠在他日歸來願卜鄰

白鴈

稻粱寒暑老營營贏得秋霜滿背明夜月蘆花空有影  
江天雪暮但聞聲鮮鮮固與常禽異皦皦尤為俗眼驚  
珍重素衣須自愛緇塵近日滿江城

雙陸

搏蒲小戲只消憂但恨無人為點筭幾箇疎星榆塞曉

半彎殘月雁門秋六軍先滿俱成列單馬如飛肯少留  
遲疾知幾應甚速不知何日取封侯

射虎

弓強矢勁馬初肥獵得南山白額歸勢力頓窮甘就戮  
爪牙雖具果何為深山百獸應無恐絕壑幽狐莫假威  
笑取髑髏橫作枕壯哉殊足快當時

梅信

破雪爭春喜奪魁好音到我亦悠哉孤山久渴詩人想

庾嶺初逢驛使來風細暗傳香迤邐月明難覓影徘徊  
來朝著意勤尋問只在前村野水隈

聞新事

平原草木幾無主金谷樓臺半是塵已信齊桓能輔國  
焉知陳勝足亡秦國家自昔明刑憲天地由來有鬼神  
太息渠儂終不悟脩然吾自愛吾貧

雪作蕭同可有詩次韻

風高海水化為石天迴野雲俱是冰訪戴何人復乘興



平吳當日孰先登  
清和月影明無奈  
寒入梅花瘦不勝  
大地無塵車馬寂  
曉來胸次尚澄澄

大明殿觀元旦朝儀

雲開日上黃金殿  
地迴風鳴碧玉珂  
虎豹闕臨儀仗肅  
魚龍海會俊良多  
霓裳按曲身輕舉  
天樂逢春律自和  
鷄鶩陪班臣子事  
觀時且賦太平歌

雨後

雨餘新水釣魚船  
殘日西風樹樹蟬  
閒憶平生如昨日

不知急景已中年姓名未辱當時識德業猶堪異代傳  
拔劍悲歌頻起舞茫然欲絕伯牙絃

中秋

又此中秋百恨生頻年骨肉尚飄零獨援北斗酌明月  
閒看銀河感客星極目關河歸白晝滿懷風露立青冥  
眼前咫尺清虛府未許乘鸞叩玉扃

廣寒殿殿在萬歲山上山在水中高數十丈怪石  
古木蔚然如天成殿在山兩傍稍下復建兩亭

正當山半又有殿縈然竹石間山下積石為門  
門前有橋橋有石闌如玉前有石臺上建圓殿  
繚以黑粉牆如太湖石狀臺東西皆板橋橋東  
接皇城西接興聖宮水光雲影恍惚天上喜而  
遂賦二首

萬歲之山天半青廣寒宮殿倚空晴雲生檜柏巖巒  
日射蒲荷海水明白玉闌深仙仗隱綠楊橋鎖小舟橫  
人間天上神飛越恍惚霓裳第一聲

怪石疎林遠艮岑經營已近百年今樓臺白日神仙集  
雨露青春草木深游豫無忘前聖度登臨還憶上皇心  
廣推此樂同天下四海謳歌歲旱霖

次韻家西隱叔見寄

前人碩德集隆禧二百餘年運未衰薄劣何堪文學掾  
登庸幸際聖明時蹇驢破帽隨緣好淡飯黃齏到處宜  
三讀來詩殊有感貽名善惡敢忘思

附  
來詩

檀寒紱冷宋天禧十世中間幾盛衰青紫每由稽古力  
公侯端有復初時不能拔俗慙癡叔足以光前賴阿  
宜見說除書新入手錦還何日慰吾思

孫錫種盆菊列為河圖

菊布河圖眼自寬緇衣如海不相干幽姿過雨秋逾好  
清意冰人夏亦寒晚節獨宜高自重落英雖美竟誰餐  
春風桃李非知己珍重瑤琴勿浪彈

九月三日龍虎臺接駕晚宿新店

關南九月草淒淒又見征人戍蹕歸  
日落羶車圍野宿天寒塞馬覓羣嘶  
徬徨戀闕孤忠在俯仰隨人百計非  
猶幸諸公同笑語歸來茅店謾鷄棲

九日次韻

京華四載倦為客樂事良辰豈得兼  
官況甚於紗帽薄酒懷聊為菊花添  
文章無用甘牢落刀筆隨宜謾伏潛  
忽得新詩破孤悶為君一笑起巡檐

九日以公事隨官曹之西山新寺與宋良卿遍遊

諸寺

京城西北地多幽，依約江南九月秋。  
湖岸草枯霜欲下，野田水落稻初收。  
鄉心無奈還隨鴈，機事相纏獨愧鷗。  
猶喜簿書今頗靜，追隨官長賦清遊。

西山即事

鰲頭突兀黃金殿，水面空明翡翠樓。  
錦繡山河天有待，帝王宮苑地長留。  
烟迷柳影三山曉，月浸荷花十里秋。  
更一登臨多勝槩，五雲南上即神州。

玉泉山

楊柳芙蕖接斷岑，流泉如玉本源深。  
四時激灩無晴暖，一派清泠有古今。  
石井分甘供御膳，湖波流潤洗塵心。  
我來正值秋將晚，獨坐長吟雪滿襟。

孤塔蒼崖結構牢，巋然俯視世滔滔。  
烟雲連野心同遠，樓閣依山步漸高。  
性本虛明宜自得，無經悟入亦徒勞。  
可憐有客勤三禮，不見靈光現玉毫。

壽安山



漢皇遺寺在人間長使忠臣帶淚看六曲樓臺殊壯麗  
九天風露愈高寒乘輿血汗黃金輦圓殿苔生碧玉闌  
利益福田真浪語當年共想壽而安

香山永安寺

幽巖絕壑倚雲齊傑閣危樓望眼迷山勢渾雄龍虎踞  
樹陰深蔚鳥啼碑存金誌猶堪讀寺始唐家竟莫稽  
此日清游天所借明朝驢背聽晨雞

長廊徙倚愜幽期衮衮黃塵暫息機山鹿背人銜木實

石泉經砌瀉花池九天風露圍青瑣三峽烟霞遶翠微  
但恨山僧多俗客飽看清致更無詩

次友人韻

飲罷騎驢出鳳城拜郊臺下賞新晴一春苦雪花多死  
十日南風草盡生高塚累累牽遠恨流觴落落負幽情  
歸來卻憶家山好紅綠參差坐聽鶯

次舍姪尊謙韻二首

燈吐幽花豈我欺客來驚見墨離離平安有字誠堪喜

漂泊無家不自知此日禁花和露看何時野鶴與雲隨  
每懷竹下相從樂煮茗談詩事事宜

仕路莫踰科舉捷生涯賴有父書存極知世事宜酬應  
但得工夫更討論一旦風雲滋筆力九天雨露沛君恩  
歸來了卻為兒願碑刻封題記某墳

離別經年豈不思山林鐘鼎若何宜喜聞門戶能如昔  
敢意田園近稍滋浮世於人多薄惡同心為汝好扶持  
蕃生書子猶煩教他日成家未可知

次舍弟此心韻

獵獵塵沙吹曉風無端馬滑更霜濃可憐鬢雪千莖白  
纔覩宮雲一朵紅平昔亢宗徒有志此行報國似無功  
弟兄何限相思意回首長安落日中

題南雄府壁二律

榕陰滿地草齊腰官舍如僧更寂寥隙地風涼人牧馬  
長廊吏散晝鳴梟寸心謾切公家務兩耳惟聽使客軺  
可是逢迎少蹉跎謗聲載道骨形銷

少年館閣恣遊嬉老去何期墮有司  
酬應敢云千慮失奔馳知忍幾迴饑  
據鞍尚覺精神壯度嶺方憐氣力衰  
何日歸來茆屋裏夜涼閒聽玉參差

輓劉原耕并劉母黃氏宜人

令子攜書賦宦遊  
胷中初不著離憂  
懶看綵服爭春色  
喜見梅花寄隴頭  
高塚松楸殘照雨  
平原禾黍舊時秋  
貯書淑子無遺憾  
細讀豐碑識故侯

洪都人李仲俊至

避人避世愁無奈  
全節全身計未差  
始信盛衰元有數  
敢期漂泊老無家  
鱣鯨失勢滋螻蟻  
鸞鳳韜光噪晚鴉  
未必蒼天終困我  
春風骨肉故園花

題許氏蘭秀軒

淨几明牕春迭蕩  
湘花劍葉影扶疎  
易當妙處花前讀  
詩到工時葉上書  
舊雨栽培還若此  
只今離亂定何如  
獨憐諸老留題在  
恍惚幽芳夢故居

偶題二首

堦前榕葉亂如雨  
牕外老鴉啼向人  
垂老觀書偏損目  
殊鄉哭友倍傷神  
古今生死真常事  
家國安危係此身  
嶺海願言將息好  
天根月窟有餘春

嶠南何似八九月  
暑氣著人如火燒  
近午炎光幾奪目  
此時厲氣正生苗  
但教節飲神應旺  
尚覺寬心脈自調  
但得太平開嶺海  
歸尋舊隱老漁樵

九日

痛恨長安信息乖  
江南江北半雲霾  
極知隨處有白酒

爭奈憂時無好懷  
淡淡黃花誰作主  
蕭蕭紅葉自空階  
亂離不敢登高處  
忍見蒼生萬仞崖

芙蓉菴山亭始於漢隱老康容所居後葛仙翁煉  
丹於此竈尚存旁有石煤如豆

一菴高寄碧崔嵬  
山崦芙蓉錦作堆  
滿眼烽烟天地老  
隔江樓觀畫圖開  
雲房猶是康容宅  
丹竈空餘晉代煤  
豈為登臨行樂計  
要從高處望蓬萊

題寄曹溪禪寺并東南山長老三首



親承祖意振宗風一派曹溪萬折東傍石作亭憐卧虎  
臨泉持鉢度降龍天開圖畫平山勇人仰菩提四海同  
劫火彌天仍獨在吾師信是佛中雄

詔持玉節遍諮詢嶺海重來白髮新濟世不存菩薩行  
當年徒見宰官身痛憐世外何多劫遠想山中別有春  
寄語堂頭大和尚何當握手話前因

萬剎飛灰海變田是中孤塔尚歸然此山可謂有盛福  
當世宜稱第一禪直指人心懷達摩洗空塵慮憶坡仙

少須了却澄清志拂袖從師學引年

聞瑞州太守東廣憲副宣命俱至喜而賦之

筠臺璽檄珠猶濕東廣除書墨又新草莽何堪蒙聖眷  
非封猶下念孤臣茫茫關塞連烽火莽莽乾坤溷劫塵  
嶺海微臣無補報提攜風紀保斯民

暇日有懷士彥四首

誠心公道宜開布愚婦愚夫更有知遇事當從彝理聽  
操心應比孽臣危海翁易慮鷗飛去盧老忘機虎卧隨

共說此君曾學道是中滋味願深思

提攜寶劍斬長蛟獨運神機不憚勞快觀中天懸日月  
徐看滄海息波濤劇談英武今誰敵若論猷為昔更高  
老我惟當相羽翼太平和氣要薰陶

溝壑崎嶇徒自苦每尋正學究天人狼貪虎競從渠鬪  
月窟天根自有春平昔操修惟至善此來受用是清貧  
是非黑白吾寧辨願振臺綱洗瘴塵

老病君王不見疎鞠躬盡瘁意何如清晨上馬了公事

靜夜張燈課子書氣直干霄山岳動精誠貫日鬼神徂  
請看南海韓夫子援筆為文徙鯉魚

次顏子中都事韻

猶當相與守危關自古忠臣鐵作肝非敢偷生忘故友  
且須忍死報平安干戈荏苒情何極禮樂隆平運未殘  
攬轡澄清當努力誠心北望思漫漫

次韻

將軍號令凜寒冰鷄犬村村夜不驚弓勁始知雙臂健

賊多翻覺此身輕  
兵戈劫運臨關盡  
烽火妖氛到海清  
笑取虎符歸故里  
茲行殊不負平生

歲晚書懷

一官歲晚尚驅馳  
骨肉遙應別離衰  
世功名何足貴  
暮年風節正須持  
凌人劫運今還盛  
報國忠心老未衰  
奏凱還家歸路好  
綵旂春勝簇前旗

除日試筆

桃紅酣雨更精神  
久客俄驚節序新  
好是一年將盡夜

喜看萬物又回春  
元正紀朔還逢甲  
穀日祈豐復得辛  
泰運昭回消劫運  
嶠南同作太平民

元日試筆

曾隨仙仗立仙班  
誤逐紅塵落世間  
遙向孤城瞻鳳闕  
定須清夢遶龍顏  
乾坤劫運隨雲散  
嶺海春光帶雨還  
三祝聖躬千萬壽  
老臣長與護梅關

寄士彥監憲

半載韶雄厭滯留  
雨添新水送行舟  
何因不動南來興

所願聊分北顧憂  
賈誼感時書  
潸淚孔明經國筆  
為籌使君倘採強邊策  
春滿關南十五州

元宵奉邀使客張鵬飛照磨過官署小酌

北走南奔今日苦  
東塗西抹少年曾  
何妨過此共明月  
勿謂亂來無好燈  
天上黿山空入夢  
城中竹葉謾為棚  
九城風景雖寥落  
頗覺承平氣象增

夜闌再用前韻

夜半尚聞簫鼓響  
開門領客興來曾  
歷千萬劫有今日

近四三年無此燈兒女競歌桃葉渡風光翻盛木香棚  
承平願與民同樂老遇艱危氣益增

明日鵬飛照磨賜和再用前韻二首

自憐老去情懷別笑拾花鈿不復曾良夜好天千載意  
光風霽月四時燈暫辭江表烟塵海偶上人間傀儡棚  
一片忠君心似血鬢邊白髮邇來增

討賊七年殊費力致多如此舊何曾幸無驚犬去吠月  
贏得閒錢來買燈正好從容花海會莫教零落翠雲棚



兒童笑指遊人醉共說新來酒價增

偶成二首

中慶堂前日欲西  
干戈未息思依依  
但知為國事經濟  
縱使傍人說是非  
衆口難調無善策  
人心如面有危機  
揆予俯仰無慚忤  
山鬼通神自向微

寸心長共白雲馳  
時遶蒼龍闕角飛  
羣盜紛爭何日了  
中原北望幾時歸  
天心劫運應難測  
世故人情愈覺非  
坎止流行隨所遇  
商顏芝草及春肥

寄義士吳元良

幾年四野龍蛇鬪嗟子勤王獨至今曾為憂民添白髮  
屢從殺賊見丹心當思臣節如山重更憶君恩似海深  
善惡貽名宜慎擇倚樓西望為長吟

曾惟吉乃祖巖山先生三告身

起家在宋當淳祐文武兼資早致身翠竹蒼梧家學遠  
迴鸞翥鳳詒詞頻桑田滄海人何在錦軸牙籤墨尚新  
觀物使人雙淚墮痛憐封詒總成塵

奉別瑞甫高掾郎還南臺

市舶亭前新水長  
樓前欲發奈情何  
莫愁柏府同天遠  
所喜南風五月多  
勁氣橫空秋迭蕩  
清標映日玉嵯峨  
矧君素節廉如水  
未必黃庭肯換鵝

分司北道留別監憲五首

玉節光浮士氣和  
不須更問夜如何  
湟中願學趙充國  
徼外當如馬伏波  
要使蠻夷歸禮樂  
佇看崩海罷干戈  
不煩主將多憂顧  
笳鼓歸來襍凱歌

巨鎮名藩壓海濱  
豈期四海漲烟塵  
丹心激烈寧辭老  
玉斧驅馳不為貧  
此際出師宜有表  
向來餽餉豈無人  
勿容耿鄧專前美  
好遣皇家識漢臣

志未能酬賊未除  
衰年豈敢戀安車  
願言息壤堅盟誓  
從使中山有讀書  
寂寞宛如天寶後  
昇平無復至元初  
會當勒石凌烟閣  
返我承明舊所廬

玉節提兵昔見之  
風流儒雅是吾師  
據鞍矍矍鏢誠畫  
橫槊從容謾賦詩  
破賊要如驅海鯉  
憂民那得避仙螭

強兵富國當留意乘興長驅庶可期

羣盜紛紛苦未休檄書催我上韶州  
已看肥犢供新饌更泛清尊慰別愁  
天眷老臣恩至渥君於老友禮殊優  
他無補報惟忠義明日驅車不復留

謾書

麾下更無兵可調城中又乏米堪憂  
孰為報國忠君計姑作求田問舍謀  
免只守株寧可待魚從緣木豈能求  
老夫束手愁無奈白盡平生未白頭

寄蒙君禮元帥

俄驚飛鳥度轅門殺氣平將賊砦吞社稷人民俱政要  
豺狼蛇虎總消魂軍心一若背水陣糧餉多於五丈原  
俘馘凱還應有日奇勲泚筆為君論

水仙花二首

水府羣仙別一家清標為洗世鉛華霜根種種八九月  
獨幹亭亭四五花素質自堪齊玉雪冰肌那肯混烟霞  
他時明月瑤臺下一笑相逢更絕佳

凌波仙子太輕盈  
鍾得扶輿氣質清  
太史謬稱礬是弟  
花神應許我爲兄  
翠葩不逐春風轉  
玉骨惟隨夜月明  
置向席間看不厭  
哦詩同訂歲寒盟

栽松

分司無事日徘徊  
移得新松手自栽  
直幹行看龍夭矯  
清陰留待鶴歸來  
冰霜此日存高節  
廊廟他年獲大材  
寄語樵夫休剪伐  
要看百尺接天台

歲除水仙梅菊盛  
開與鵬飛照磨飲  
於花間賦之

轉眼驚看節序新  
水仙梅菊喜相親  
時窮幸有花堪友  
道在尤多客可人  
清意紛紛涼似水  
孤標鬱鬱更無塵  
明朝又道春來到  
歲晏誰云此老貧

元旦即事錄似鵬飛照磨

旭日微雲淡淡晴  
早朝鴉鵲寂無聲  
龍樓鳳閣渾如夢  
水國山城謾有情  
浩劫固知今止極  
衰年幸再覩承平  
功成不作從山計  
擬學長沮事耦耕

元日宴集中慶堂客散後留鵬飛再酌用前韻



宴罷驚看曉日晴共傳街市有歡聲故鄉休問今奚似  
薄酒何妨更盡情遣興賦詩那用好感時撫事苦難平  
塵清共作江南計旋買荒田趁早耕

新春記實二首

新春和氣頗薰蒸共說今年可太平滿眼干戈誰擊賊  
遶街簫鼓強題燈常悲塵世陰晴半須信人生苦樂并  
老去不為兒女態引杯看劍起呼鷹

憂國煩心苦鬱蒸眼中萬事況難平開懷且共新豐酒

亂眼猶疑太乙燈  
歲晏孤蹤猶嶺海  
夜闌清夢刷幽并  
柳林記得朝元罷  
曾侍鑾輿學臂鷹

復元日韻

東風巧放立春晴  
喜聽謳歌變頌聲  
浩劫逼人還有極  
老天於世豈無情  
雲收雨罷山猶在  
日麗風和浪自平  
寄語羣兇早回首  
賣刀買犢好歸耕

試燈小酌用前韻

山澤春回氣尚蒸  
黑山四合與雲平  
清高庭館蕭蕭雨

牢落杯盤草草燈競利爭名人易老賞心樂事世難并  
老來尚被微官縛何日能如脫臂鷹

除夕韻

每憶盤銘日日新讀書燈火老猶親姓名雖或聞當世  
德業還應愧古人百歲光陰嗟白髮十年蹤跡困紅塵  
太平倘與春俱會一笑渾忘病是貧

送謝仲宜歸五羊

酒盡沙頭意惘然君今歸理曲江船曾同憂患難為別

欲取功名莫計年世亂人心機似箭雨餘山路瘴如烟  
諸君倘問余何似一片丹心可對天

寄友為紅巾破九江府

早歲同遊鳳闕前於今鬢髮各蕭然御街楊柳春風馬  
海子芙蓉夜月船滿望功名圖晚歲豈期衰朽度殘年  
九江二水難回首報國忠君各勉旃

寄鄉人袁觀所

瑟瑟秋風吹客衣夜涼如水局勝悲早知多難有今日

何得長貧似昔時  
華屋淒涼芳草合  
黃金散盡壯顏衰  
妻孥流轉無消息  
幸賴網維有故知

題劉大觀詩卷後

少年壯氣拂雲霓  
馬上鷹揚老未衰  
蕩滌奸兇仍好武  
遨遊江海更能詩  
池荒固自多春草  
世亂偏驚見瑞芝  
何況屯田有長策  
曲江真足駐雄師

九日置酒與從事飲酣書事示李子運

倏而虎鼠倏蟲沙  
世變如雲似未涯  
幸有故人來白酒

且開好況對黃花紛紛涼月中軍帳獵獵西風絕塞笳  
料得來春匡濟了笑扶玉節共還家

次韻

懶能策蹇詣時官且喚青山共倚闌春到謾尋花作友  
客來須借酒為歡山中泉石論交易天上風雲入夢難  
奉母讀書今有日卻從北斗望長安

中秋有感

京國湖山十二年年年兩地望嬋娟流光過客催我老

明月與人今夜圓  
又逐雲萍來嶺表  
幸同兒女樂尊前  
可憐有弟頭如雪  
爛漫斑衣遶膝邊

登快閣

一登快閣情何極  
太史騎鯨已上天  
烟樹溟濛秋可畫  
江山空濶客如仙  
半生不識東南路  
浪迹深慙上下船  
四海故人今聚會  
忽驚歌舞落尊前

題興化縣嚴士奇詩卷

盤錯載逢知利器  
冰霜屢閱見生涯  
輕車熟路老為縣

短什長篇真當家今雨田田饒穀粟東風處處長桑麻  
公庭靜坐無餘事閒數梅開第幾花

送徐伯高

共宦關南三見秋相看政好又韶州故家喬木今千載  
碧嶂清江第一流案牘暇時仍閱史江山佳處更登樓  
如今刀筆皆為相好取功名趁黑頭

送李子潔巡按

十載相違一見君何堪歲晏又輕分南風十日不成雪



一雨滿山都是雲滑滑長途宜自重蕭蕭孤驛不堪聞  
周原郡邑咨詢遍為弔斯民志獨勤

次韻

節序匆匆又落花幾迴滄海歎乘槎不聞庭竹來鳴鳳  
祇見宮槐噪晚鴉老去可憐心轉赤悲來那覺鬢生華  
明當拂袖江南好山雨晴時筍正芽

奉別瑞甫高掾郎還南臺

嶺海屢驚來詔使蠻方孰不仰皇都自憐老去難為別

但有人來莫惜書乘興何妨吟萼棣思歸應不為尊鱸  
臺端歷歷陳時弊十道疲民未得甦

有懷蒙泉都帥二首

討賊提兵垂十稔老成練達亦吾師豎儒幾敗乃公事  
男子要為天下奇公瑾孤軍鏖赤壁謝玄勁氣破淮肥  
從渠百萬終為賊要取梅關卻賦歸

卜式助邊常百萬如斯乃可濟時艱傳家自有遺經笥  
報國無忘拜將壇滿眼黃金輕似土他年清節重如山

廣東未必真忘我但有官鹺定撥還

韶州圍城

浩劫如天似未涯生民性命等飛花  
兵戈轆轤動萬計柴米從容有幾家  
宇宙豈應將拆裂英雄到此謾咨嗟  
忠肝義膽難磨滅自昔睢陽世共誇

枕上偶成

常思為國致昇平每事參差謾有情  
天魔未除難學道國糧不足莫論兵  
痛憐劫運如長夜起視明星近五更

待得朝廷消息好笑攜兒子賦歸耕

答胡海翁胡宗性重謁

悠然無語眄庭柯風雨傷春奈若何  
浮世周旋如子少餘情流麗向人多  
好詩寄我頻三誦窮巷經年一再過  
無酒固難淹李白空餘文燄照松蘿

附來詩

暖雲扶綠上林柯春去春來可奈何  
遠道塵泥行客少故園風雨落花多  
擷蘭溪上心非隱種柳莊前足

怕過尚意玉堂青眼舊肯嫌俗駕忤烟蘿

惟實集卷六

欽定四庫全書

惟實集卷七

元 劉鶚 撰

七言絕

寄舊友張漢傑二首

幾度思君欲白頭  
淒然常隱去年秋  
此心恨殺中瀾水  
不向棲霞樓畔流

雙鳳堂前日往來  
東坡池上幾徘徊  
遙知尊酒相逢處

風雨淒涼半是苔

九日峽江舟中

秋風如此客辭家重理平生舊帽紗  
不是故山無白酒年年奔走負黃花

仙苑

風雨凌空一葉飛師生邂逅即天機  
山林小草知何限汝獨神仙得所依

秋山圖

石田荒盡豆苗稀  
素化為縑尚未歸  
不是此山無好景  
草心正欲報春暉

清明有感

花開如雨柳如烟  
風景雖奇節序遷  
兒女不知春漸晚  
隔牆猶自弄鞦韆

楊花

如雪紛紛不自持  
殷勤長藉好風吹  
莫欺此日飄零甚  
猶有為萍變化時



城南飲歸

無分騎驢趁早朝  
城南飲散雪初銷  
北風吹酒忽成醉  
夢裏行過第二橋

題東山高卧圖

東山攜妓嬉遊日  
敢意曾存萬甲兵  
今日總戎真豎子  
徒耽歌舞誤蒼生

寄士彥僉憲十絕

城郭荒村處處同  
五羊樓觀倚晴空  
時平若建麒麟閣

更畫何人第一功

訓練精兵捷若神從渠百變日如雲向來諸葛今何似  
青眼高歌獨望君

世祖成宗德業深百年培植士如林登車攬轡平生志  
孝子忠臣萬古心

情好雖親音問疎秋來眠食近何如因風敢致平安問  
謾折梅花當寄書

綠章夜奏玉皇家八載奇勲信可誇待得九重丹詔下

共君握手看梅花

自別京華意惘然浮雲過眼十三年白頭太守成何事  
又促乘驄瘴海邊

會稽山與白雲齊海濶誰憐雁過稀猶幸嶠南天氣暖  
免教遊子歎無衣

更無錢可歎空囊杜老何從糴太倉共說羊城饒貯蓄  
山中尚有禹餘糧

帝王曾此理薰絃尚覺遺音滿耳邊若使聞韶仍大嚼

絕勝騎鶴更腰纏

蕭蕭木葉落窮冬倦客愴然況味同珍重孤根如鐵石  
少須明日又東風

題應瑒三入承明圖

安車三度入承明七子詩應讓老成好是衣冠遺澤遠  
諸孫猶自負廉聲

題聶侯所藏美人圖

紈扇將題若有思芭蕉陰裏立多時精神飛度君王側

不覺忘形下筆遲

題坐睡圖

劫塵不到華山雲  
岸幘披襟立樹根  
世事料應看不得  
何妨合眼且忘言

贈琴士翁希疇二首

唐虞世遠已堪憐  
況值干戈十八年  
民愠不知誰為解  
煩君共我理薰絃

高山流水幾知音  
靜聽君彈感慨深  
縱使鍾期如可鑄

更從何地得黃金

五王並馬圖

春風並馬宛如仙  
夜雨淋鈴似可憐  
太息弟兄多若此  
更無能識九齡賢

題栗侯所藏牡丹菊圖二首

洗盡繁華賦楚騷  
秋風澹泊苦相遭  
沈香亭北多佳趣  
爭似柴桑栗里高

國色天香結習空  
寒英晚節竟誰同  
平生富貴渾忘卻

宛似脩然國士風

題胡彬所藏乃祖澹菴書藁後二首

上書乞斬秦丞相海島生還已白顛尚幸老臣心似鐵  
平生風節愈蒼然

曾拚一死爭三事思退如今又一秦昔秦但知強國體  
似公忠義幾何人

野史口號碑四十四首

近城民砦十破九元戎束手末如何宜章軍馬雖無敵

只恐來時風雨多

彎頭又益湖南賊近郭時時虜掠人足食足兵無早計  
明年此際恐無人

五百健兒乘銳出十三個賊一時來行糧功賞俱烏有  
興盡翻然解賊回

好利善諛周亞父特皆收錄作親臣憲君縱有春如海  
那得吹噓及遠人

已聞祇候升州判巡徽俄聞亦佐州英德只今為外府



官民多怨更多愁

曾聞濯足折黥布供帳俄驚王者同豪傑尚須如此待  
況今不過小夫雄

城中謾有達喇罕城外仍多呼喇孩城外城中無可那  
生民憔悴轉堪哀

何以齊桓成伯業為能專任管夷吾毀譽黑白今無辨  
後世誰烹阿大夫

憂國憂君臣杜甫無聊無賴只吟詩當時一片心如血

贏得千秋萬古知

得財縱賊尋常事為報私讎或滅門我亦臨風長太息  
一家富貴百家冤

水軍萬戶嗟何益何者為軍何者船料想此時為此策  
權都歸已利都專

羣兇冗擾心何一二帥參差意不同關北翻傳消息好  
關南河道幾時通

蒙君號令明如日兵罕相違便斫頭孺子紛紛無足數

濫叨功賞取封侯

蒙君信是奇男子誓滅官陂老賊圍嘗膽卧薪心獨苦  
惜無公是與公非

直將民社同兒戲不蓄干戈不蓄兵軍馬不來無別策  
只催百姓急脩城

賊兵欲向翁源洞糾合官陂來打韶此策若行誠可慮  
南雄唾手可能招

遮留使者來文牒恃勢要君真可誅憲紀皇皇無示弱

盛衰關數不關渠

王師為體須持重主將猶須紀律明功業直須豪傑做  
如何貪鄙可論兵

羣賊知無兵可恃邇來充斥遍西郊官陂忽聽兵雲合  
賴有元戎為解嘲

墳墓俄驚俱發掘妻孥生死若雲浮憑誰乞我金千鎰  
自願提兵殄寇讎

五鬼相纏何日了一官如水曷勝窮謾憑商賈供薪米

亂石灘頭一夕空

甌已破矣顧何益  
好把胸懷大展開  
天賦我才應有用  
千金散盡或重來

搏沙儘力苦難合  
誰識同心利斷金  
白髮老臣腸欲斷  
忍看民社付浮沈

北道只云張帥在  
憲君倚賴重如山  
那知世道如前險  
二使遭逢亂石灘

水軍萬戶新開府  
氣勢憑陵藹若雲  
又欲遣人求二使

倉皇一夜竟無軍

責人以禮翻成怨待只依稀恐失幾幾到兩難無處制  
是非莫較不如歸

城南健兒亦英銳惡若哮虎何崎嶇昨日送船多戰死  
興言討賊亦寒心

東村喪牛不滿百西村喪牛百有餘牛盡田荒民困苦  
爭趨刀劍去犁鋤

解衣衣我食食我况兼別眼意尤親赤心効報翻成咎

自笑書生太認真

邇來比比都元帥聞此令人頗失驚顛倒羣雄固如此  
但愁識者反相輕

俄聞二使俱遭繫九曲愁腸痛不禁卻憶今年正二月  
曾為傷虎故傷心

料想衣裳俱剝盡幸憐肢體未傷殘愁心耿耿知無寐  
況值嚴冬夜苦寒

生民困苦亦已極官府徵呼又逼人上下但知求富利

不知總為賊驅民

生民憔悴可痛哭無處告訴只顛狂更看消息還何似  
亦復東風到五羊

七十已衰仍苦病自憐無力任驅馳明當告老乞骸骨  
孝子忠臣兩得之

西江涸轍望君久朝廷倚君真如山北來軍馬已雲會  
好調元戎早出關

可憐仁化蒙君禮討賊晝夜多經營當時不兼官陂砦



此際賊盜已臨城

曾因犯律殺愛卒每為養士揮千金關南豪傑有如此  
太息誰人知苦心

賊兵如入無人境村落多為失主民束手待看臺領破  
班超介子果何人

可憐日蹙國百里昨日又破陂頭村啞子食茶徒自苦  
少陵欲哭又還吞

監司待我真骨肉我敬監司如父兄縱使監司如可負

敢欺明主負朝廷

此來恨殺鸞頭賊白晝蓮花峯上旗監前半夜鬧到曉  
公然對面相陵欺

兩月河流乾欲斷南雄消息了無聞苦無良策開道路  
時復北望瞻風雲

老軍樵採供衣食官府饑寒痛逼之賊滿四郊無處採  
忍聞半日盡逃移

連山縣尹古文曾玉輝沒於寇購得其妻高麗娘

子及子燕京驢為收骨殖資贈還鄉

莽莽愁雲度庾關八十餘里到連山  
英雄有骨天應相得共妻兒一共還

惟實集卷七

欽定四庫全書

惟實集附錄

元故江西參政劉公輓詩序

公諱鶚字楚奇世家吉之永豐為邑著姓公自幼篤學  
學既成遂遨遊四方覽名山大川以增其氣而博其趣  
其發為文辭沛然也掌教河南秩滿而歸建浮雲道院  
以居之學者稱浮雲先生累遷祕書監祕書郎與虞文  
靖公揭文安公歐楚文公諸名士日相唱和其學益大

進遷海門縣尹不赴改南雄路經歷政聲大著陞翰林  
修撰階奉訓大夫以內艱去官至正十二年紅巾盜起  
東南諸郡望風瓦解朝廷思有以彌之以江州為江南  
西襟喉而自李黼之死民遭塗炭邑里蕭然非勞來安  
集無以為守禦計乃擢公江州路總管屯楊家湖兵威  
始振改瑞州路未赴尋陞廣東廉訪副使至廣繕城池  
修甲兵聚糧餉勉勵將士調度百出而上下欣然賊屏  
迹不敢近遂奉命專守韶州十九年授中憲大夫廣東

閻帥二十二年拜嘉議大夫江西行省參政越二年韶  
州蠻獠亂公分兵討捕之而贛寇乘間卒至時城中兵  
甚少而賊兵強盛公雖老而氣猶壯乃自將乘城命他  
將領兵出戰相拒凡一月公之幼子運亦戰死而援兵  
不至城遂陷公被執至贛賊幽之於慈雲寺時仲子述  
在焉公謂曰吾平生志氣在忠孝今不幸至此我死不  
瞑目矣作詩一首付述不食六日而卒享年七十有五  
於乎公起自儒生敬歷中外凡數十年而後受命邊閭

膺國重任不幸而國祚日危王綱日弛公之才志謀畧  
卒不及展而竟死於難豈非天耶雖然公之一死自足  
以暴白百世以愧夫叛亂之臣又何憾第當時修史者  
失之采錄不得為公立傳以附元史忠義之次然嘗之  
廣道韶聞韶人云城陷時死者尚多不止公一人今其  
姓名皆泯滅無聞古今死節之士蓋莫不然書與不書  
不足校也今年冬公之曾孫振持公生時所謂詩文及  
元進士劉玉女所撰公墓誌俾讀之既又以諸賢所輓

公詩辭屬為序故掇取公平生出處大畧以冠其首且  
以備太史氏之闕庶幾讀者有所考也明永樂五年歲  
次丁亥十一月長至日纂修實錄翰林修撰儒林郎兼  
右春坊右贊善同郡梁潛拜撰

輓詩

梁寅

世謂廬陵有四忠如公死節更希逢周綱不振無鳴鳳  
漢祚難興失卧龍國少鼎彝鐫偉績墓存碑碣紀遺蹤  
石門淚眼憑虛望天柱浮雲見一峯



鄧伯言

白鷺青原鍾淑氣鳳凰芝草協禎祥朝廷有道需才傑  
嶺海無虞佐憲綱暫假風霜清瘴癘祇將忠孝感穹蒼  
歲寒共喜堅松柏世事那知變海桑慷慨捐軀探虎穴  
淒涼歸骨葬螺岡貞魂萬古留遺恨潛德千年有耿光  
許遠不忘唐社稷蘇卿猶著漢文章哀歌有盡愁無盡  
稍稍悲風起白楊

韓夢臣

先生竟長往後死復何為松柏齊年操文章問世資故  
家成隔絕吾道屬顛危憶昔思江會相親潁水時神京  
果奇遇好爵久羈縻翰苑文衡重龍庭聖主知青衿當  
要路紫詔下天墀梗道官三載西江守一麾乘驄烏府  
出度嶺路車馳白壁元無玷丹衷誓不移臨薨書頌烈  
跌坐點頭噫行實昭文獻勲名入憲規忠魂天府眷廉  
譽宦途師義骨山靈護泉臺旅櫬悲憂天愁世墜拔劍  
撥年衰故友違投紵諸生阻泣歧定知少陵筆寫入八

哀詩

黃莊

松標悴寒冬薤露晞朝陽人無金石固焉能得靈長吁  
嗟國禎士時艱滯南鄉鵬鳥止坐隅龍蛇迫年光一旦  
忽沮謝萬化同杳茫青藜閔烟彩玉節空雲翔寶館瑟  
久撤城闔春不相故交致芻束弔客奠椒漿清名恒若  
存摘藻亦還芳千載永難晤揮淚情何傷茲晨舉丹旌  
祔葬歸丘岡

丁國卿

丹桂林中秀家藏天祿書清時膺茂選壯歲陟亨衢吏  
部才猷著詞林翰墨敷棘闈曾閱試薇省重賓儒再覩  
黃樓鶴雙飛葉縣鳧超騰瞻玉陞耿介映冰壺不謂清  
寧域翻為戰伐圖九江煩牧守五馬壯儲胥白羽輝遙  
應蒼生氣欲甦西山期保障北闕降庭除冉冉妖氛逼  
皇皇使節驅心忘家室繫操凜雪霜俱涕雨洪都外英  
風碧海隅憲綱明要典軍事畫良謨切慕勲猷燦深懷

寵渥殊忠旌宜炳煥直筆起荒蕪蘭玉芳聲遠鄉閭德  
望孤九京不可作感激再嗚呼

魯沂

宇宙有斯人文章領縉紳中原悲短日嶺表泣孤臣旅  
櫬驚霏雪麻衣浣戰塵招魂歸故里隕淚獨傷神

張希達

官居清要志浮雲蚤歲才名聳縉紳司馬雄文能喻蜀  
魯連大義不尊秦兒童竹馬潯陽日使節梅花百粵春

回首鄉粉清蔭少典型寧復見斯人

趙敬

一代英賢喪斯文哭鉅公艱危當大任激烈負孤忠  
勲業哀時邁文章在世雄  
況餘烏府柏颯爽起悲風

劉源

苦志絕羣經吟情役宦情  
繡衣巡嶺表玉節況心明  
文喜時人識名從蚤歲成  
如何催作頌仙夢謝浮雲

趙杞

玉殿黃金榜烏臺白簡霜文章傳史筆人品重歐鄉八  
袞康寧福三千弟子行絕憐仙去日多士總神傷

馬復初

道隱贛江邊操忠鐵石堅存心明志節淚血寫詩篇易  
見長安日空瞻嶺嶠天臨風看手澤遺恨尚依然

諸老風流盡先生尚紫宸報恩萬里道歸骨故山春文  
字傳千古簪纓啓後人交游半零落揮淚獨傷神

黃琢

青春來鳳闕白首謝龍墀聖主宵衣日孤臣投淚時殉  
身惟道在憂國有天知千載東山下行人看石碑

蕭紹宗

一從幽致浮圖寺羽化翩然叩帝居為掃兵塵連否極  
故游神氣反元初儀容固覩歸靈櫬風采猶疑在使車  
事業文章終有紀應留珣筆為公書

文允中

廟堂彝鼎已銘勛三尺蓬蒿蔽古墳無復風流如此老



孰知天意喪斯文  
遼城鶴語當斜日  
宰樹猿啼黯斷雲  
青史百年遺論在  
令人惆悵仰清芬

段琇

少年意氣動宸旒  
晚歲功名負海舟  
紫綬金章閒歲月  
青天白日照羈囚  
丹成不作崆峒住  
尸解真成汗漫遊  
公自逍遙人自戚  
西風黃葉不勝秋

劉德俊

暮年持節繡衣班  
經濟才名豈等閒  
誰想中原遭板蕩

遂令南國際時艱  
神仙路遠來何晚  
天帝樓成去不還  
歸到歐鄉扶旅櫬  
霜風吹下淚潸潸

蕭規

蓬萊水淺劫灰飛  
嶺表孤臣白骨歸  
班固文章猶鼎盛  
張綱事業竟睽違  
書存天祿藜烟滅  
歌送卬山薤露晞  
獨覺詞林失根柢  
誰憐小子舊瞻依

羅達

館閣文章舊聲華  
冠士林柏臺恩澤厚  
梅嶠雪霜深遽

作遊仙夢應輸報國心朔風丹旆遠客淚一沾襟

吳汶

文章垂世稿猶存齒德廬陵表達尊四品已堪榮晚節  
百身無復贖羈魂歸船淚溢章江水哀些聲傳憲使門  
盛德宛然猶可見森森蘭玉似春溫

胡天全

大父年過一百餘作詩曾寄遠遊孫歸來甘旨能終養  
劉氏終為孝義門

椿府森嚴教一經宦途由此立功名榮親追贈彭城伯  
富貴文章見死生

解養慈親二室人彭城舊郡總封君非誇冬筍冰魚味  
紫誥同封世共尊

芹官職教列文臺講下諸生自遠來豈特菁莪成美頌  
至今楚些羨奇材

作賓漕運及黃堂修撰文華動帝鄉歸把浮雲名道院  
詞臣黼黻永流芳

元季干戈禍不輕李侯死節重江城朝廷遴選公來繼  
數載荒區集義兵

再守筠陽謝國公柏臺作吏廣韶中少親民務多軍務  
白簡飛霜毒霧空

一登帥府總戎時大厦將傾勢莫支香積厨邊饑不食  
自知死節是男兒

如儀棺殮二郎賢兀兀靈輅送及泉天柱峯高接雲漢  
想應號泣動旻天

捐軀報國誓當年  
瘴海孤忠萬里天  
只恐史臣編不到  
老夫和淚寫新篇

湖海翁天全臨卷傷悼  
寫成哀些十章輓者當為歌之

張翥

豈為先生慟深為世道哀  
衣冠人物盡鄉國棟梁摧疑  
事誰堪質頽風孰與迴  
扁舟丹旌遠愁上鬱孤臺

金幼孜

駁歷躋通顯蜚聲獨擅場孤忠踰鐵石志節厲冰霜孫  
子瞻遺像鄉間望耿光如公真不負百世有餘芳

周孟簡

文米先朝傑才名舉世尊赤心曾報國白首舊承恩化  
雨杏壇著清霜柏府聞金章垂紫綬繡錦炫朱門德業  
推前輩詩書縣後昆投簪期樂道絕筆竟修文已逐仙  
人侶難招楚客魂泉臺秋月冷宰木晚雲屯碑刻千年  
古芸香一卷存天涯空憶處新淚長潮痕

曾鼎

宦遊早已擅英聲  
嶺海風霜屬老成  
烏府威名馳列郡  
虎符號令肅專城  
崎嶇報主心常苦  
慷慨捐軀志未平  
千載廬陵忠節郡  
貞魂凜凜尚如生

彭汝器

東廣傳遺愛  
西江失老臣  
居官貧遺子  
守節晚留名  
歲應龍蛇識  
山空猿鶴驚  
崆峒歸旅櫬  
丘首得佳城

蕭鎡



遊魂竟入鳳臺鄉地老天荒歎渺茫綠水青山迷道路  
白雲黃壤蓋文章功名分上無心願經史案頭有墨香  
恨到九京應不瞑泉扃耿耿夜天長

吳仲珠

賊陷嶺南時城孤力不支甘心死有分唾面降為癡寧  
斷果卿古誓歸馬援屍佛堂留絕筆天地鬼神知

劉虬

夙昔才華動縉紳家為孝子國忠臣揮戈欲挽桑榆日

持斧曾向南海春  
章水僧居悲過客  
故山道院隔浮雲  
平生樹立家聲遠  
潛德咸彰太史文

胡廣

蚤歲才華動紫宸  
誰知鳴鏑起風塵  
誓師諸葛空存漢  
裏革馬援豈愛身  
庾嶺梅花傳玉節  
萇弘碧血化青燐  
崆峒不挽浮雲住  
淚洒西風暗愴神

周述

嶺表孤城烽火秋  
勢危建節老臣留  
百蠻瘴癘旌旄暗

萬國軍聲海氣浮  
學士文章光日月  
柏臺忠義老滄洲  
身經百戰寧辭死  
天地無情草木愁

曾 啓

浮雲事業竟何之  
曠代奇人死亦奇  
志在山河危仗節  
心關天地愴留詩  
鼎湖龍去風波靜  
遼海鶴歸夜月遲  
父子雙忠銘竹帛  
綱常千載並扶持

劉 素

嵩嶽千年間氣鍾  
久從學海景人龍  
雄文倒峽標章漢

大節擎天上鼎鐘  
瘴海揮戈斜日返故山  
歸骨白雲封  
士林慟哭留詩史  
颯颯悲風起澗松

朱縉

中原遭板蕩  
嶺表尚風塵  
握節詔專閭  
安邊命老臣  
旌開瘴霧華彩動  
楓宸  
蘇武終歸漢  
魯連肯帝秦  
欲回滄海日  
不負雪霜身  
衰世悲鳴鳳  
斯文感泣麟  
浮雲送過客  
驚水來歸人  
荒草淒墳土  
愁看淚滿巾

裔孫希旦

憲節昭垂萬古芳  
仰承忠義有餘光  
貞魂凜烈輝山嶽  
國祚潛移變海桑  
禴祀彌新靈儼在  
孝思長繫耿難忘  
年年展拜登丘壠  
颯颯悲風送夕陽

裔孫希奭

滄桑閱遍幾春秋  
哭望旌旗庾嶺頭  
南海誓師山岳壯  
故鄉歸骨鬼神愁  
運移元祚知難復  
誓報君恩死未休  
一上荒塋風露冷  
淒淒寒月照松楸

裔孫公熙

運祚傾危勢莫支  
韶城戰守共幼兒  
拚將一死酬君國  
孰鑄雙忠上鼎彝  
灘水鳴號歸旅櫬  
詞林悽惻哭留詩  
孤墳三尺餘荒草  
淚洒西風百代悲

裔孫冠

傳家惟忠義  
世守耿難忘  
報國臣子志  
一死有何妨  
至今正氣烈  
耿耿日月光  
富貴浮雲視  
名節史冊香  
詩書遺我後  
凜凜存墨莊  
歲時展止隴  
野日白荒荒

裔孫士彥

板蕩中原事已非老臣持節陷重圍戰深海月連烽火  
血灑陣雲上繡衣正氣儼同河岳壯貞魂仍向北平飛  
白楊秋草淒墳土望斷南雲化鶴歸

裔孫士章

在昔元運終吾祖守韶雄六載軍威振稍稍集哀鴻那  
知烽火遍南北路不通孤城既少援兵盡糧又空賊勢  
愈猖獗屯聚若蟻蜂父子親督戰陣亡先運公韶城旋  
失陷被執過崆峒罵賊義不屈死與巡遠同我生世已

後憑弔撫遺蹤一官仍首霜皋比坐從容感懷千載上  
正氣若霓虹河岳與日星俯仰又奚窮

裔孫可規

七十人生古所稀我公仗節魯戈揮豈知元祚傾難復  
力掃中原志已違心戀闕廷無報効陣亡幼子失瞻依  
年年展拜登荒隴義魄還隨三島歸

張元銳

丹心常耿耿勁節晚蒼蒼楊僕專征伐蠻江起戰場孤



臣頭可斷千載骨猶香往事誰堪擬睢陽與晉陽

朱玉朗

五嶺烽烟天柱折英雄喪去灘嗚咽蠻江風雨夜猿啼  
光嶽千年正氣烈蚤歲才華入承明一麾出守建奇節  
生死不負元社稷罵賊寧斷杲卿古公有幼子先陣亡  
雙忠銘鼎真人傑勿道史臣編不到精靈貫日中天揭

聶大綬

富貴浮名何足數惟有節義光千古骨化形銷聲不磨

地老天荒心獨苦先生壯歲入承明  
晚向嶺嶠建開府韶石雲擾曲江翻  
邑屋蕭條無淨土睢陽羅雀力已窮  
越石重圍身無主邪許莫呼神鬼愁  
西南地陷終難補祇有一死報君恩  
信國先後堪繩武人生死所最難得  
英風不共草木腐父子雙忠事真奇  
綱常千載擎天柱寶氣埋光四百年  
胥井函書聲華吐劫盡灰飛此集傳  
都是養弘碧血聚

蔣璟

古郡素稱節義邦文忠表表擅歐鄉宋朝養士三百年  
信國誓師起勤王正氣一歌天地老千秋廟祀螺山岡  
大元忠義劉大參父子仕元守廣南嶺海強寇蜂蟻集  
嗟哉國步際艱難運移元祚難恢復一天風雨殘兵哭  
公之幼子出陣亡報國忠君義不辱崆峒山高落日低  
孤臣誓死甘如飴我來憑弔鬱孤臺西風灑淚誦公詩  
解以敬

瘴雨蠻風海國愁孤臣卑閭幾春秋波翻盧水天難問

身死浮圖恨未休  
越石晉陽心力竭  
文山柴市姓名留  
忠魂靈氣之何所  
長向九成臺上遊

鍾維楨

嶺表驅馳擁節旌  
樓船揚僕自專征  
運移元祚時難挽  
風起曲江浪不平  
取義成仁行所學  
勒鐘鐫鼎得其名  
浩然正氣今猶在  
韶石山高恩水清

程衛

嶺海有雄關  
鎖鑰控百蠻  
瘴烟連粵海  
世危防禦難  
劉

公建奇節仕元朝命頒授公廉訪使移師鎮韶南強寇  
不敢犯號令嚴如山令子元帥府分兵守其間百戰先  
陣亡報國誠無慙兵盡孤城陷罵賊果卿顏囚公義不  
屈誓死性所甘慈雲題絕筆撫事淚漣漣雙忠垂竹帛  
勲名日月攀

劉士晉

近讀忠臣編先生父子傳文章輝柏府勲業著南天血  
戰沙場月魂飛瘴海煙一門全大節千古仰名賢

宋上達

百歲有時盡芳名萬古揚山河撐正氣金石煥文章戰  
死風雲暗遺詩日月光雙忠垂竹帛奕代肅烝嘗

程謀道

元代有禎祥如公應屈起讀祕膺雄藩心猶江漢水戰  
賊苦無援可憐失幼子被執奈何天不食豈得已大夢  
落江山烈心疑未死堪作懦夫程還令奴顏恥節義顯  
文章馨香百世美素位合中庸汗簡千秋紀

張允沆

炎方作鎮髮星星海國波騰似濁涇祇以死生扶社稷  
長留氣節塞蒼冥于今俎豆新崇祀有子忠勲共勒銘  
身去名存青史在千秋憑弔讀遺經

湯道生

取義成仁浩氣雄英風凜凜壯懷中精神不逐烟雲去  
忠節能令天地通獨力支撐天下事寸心特表聖人衷  
慈雲寺裏靈猶在化作啼鵲帶血紅

謝可法

先生真取義殺身亦奇哉  
七尺爭天地孤軍耀斗台  
丹衷貫皎日正氣塞塵埃  
凜凜雙忠在狂瀾砥柱迴

湯楨

大地茫茫四百秋如公事業孰堪儔  
專征嶺表同楊僕力掃中原頡武侯  
死義虔南堅晚節葬歸天柱冷荒丘  
芳名終得垂青史檢讀遺詩神鬼愁

陳之麟



蠻江毒霧暗風塵仗節韶城誓殺身百戰孤軍寧論命  
千秋大義只成仁臨戎巾服真儒者貫日丹衷表老臣  
若到浮圖尋絕筆士林悽惻恐傷神

張允洪

瘴霧蔽天海國墟孤臣不惜老頭顱慈雲寺裏題紅血  
天柱峯前駕素車豈為令名光汗簡但還浩氣與太虛  
騷人欲寫平生志只在浮雲一句書

劉芳漢

乾坤板蕩抱懷孤每話紅巾淚日枯符節嶺南制專閩  
安邊韶粵仰名儒旌麾瘴癘百蠻逐氣肅風雲萬國娛  
古道廬陵忠節郡增光俎豆不能無

李向旦

戎寇紛紛亂南土可憐忠義死于槽人間鐵石作心腸  
天上銀河洗肺腑只說疆場難未平誰云家國空無補  
文山正氣滿乾坤父子如公堪步武

裔孫于廷

積思不可極日向紀編尋象郡見奇節羊城留憤吟凜  
然顏杲古烈矣比干心幸表雙忠蓋歐文共古今

裔孫天受

粵海詔分閩神州遽陸沈酬恩三尺劍許國一生心青  
史芳名古孝思歲月深

聖朝旌典在廟祀到而今

裔孫剛

烟雨凋殘數百秋精忠耿耿孰相儔惟存社稷堅生敵

不脫干戈誓死休疏上皇廷光簡冊事宜益師兩疏詩遺佛寺

壯山丘

贛州府慈雲寺於今

聖主褒忠節俎豆增榮繼宋歐

附

弔楚奇公子忠節尊元公

大元雙節義正氣逼塵埃庾嶺狂瀾挽蠻江砥柱迴文  
章昭萬古勲業炳三台高壘瘞靈爽芊芊草木哀

戊申暮春懷元忠節楚奇公浮雲書院遺迹

浮雲址畔草離離極目蕭條獨鎖眉古樹淡烟殘夜月

落花疎雨暮春時蛙聲疊疊添新恨鳥影紛紛起舊思  
更向坡前閒悵望水流山繞不勝悲

元故中順大夫海北廣東道肅政廉訪副使劉公  
墓誌銘

公諱鶚字楚奇世為吉永豐顯親里人曾祖思才祖士  
表壽百三歲父天祐昏隱德弗耀公幼穎悟知勤學稍  
進益能求師初學聲律科興習舉業屢試不第尤專意  
詩文有英俊聲年弱冠出遊四方時大父年九十有五

寄詩曰不知孫去身何地深慮舟行浪拍天公得詩即  
歸省因念祖若父皆高年不復出皇慶壬子遊淮東宣  
慰通通聞其賢舉充揚州儒學錄泰定乙丑受汴省檄  
掌教齊安河南三書院新書院以立教麟州龍先生撰  
碑文郡守房公明德刻於石考滿歸建浮雲道院為藏  
修之所學士虞公題詩曰浮雲何處來與天為文章揭  
文安公記之承旨歐陽玄賦之天曆己巳改授泰州儒  
學教授未赴京師庶府交辟初掾繕工司繼掾太醫院

以才幹稱至元丙子授將仕佐郎京畿漕運司照磨京漕三百萬出納重繁前任是職者鮮終公一無所私抗貪吏都運赫格盡革舊弊以廉能著秩滿至正元年擢從仕郎湖廣儒學副提舉時學田若干畝為有力者所據垂三十年而不能復前任是職者往往不敢舉正公至首建言省憲以身任之盡復其田居未幾擢祕書監祕書郎日覲清光與虞文靖公揭文安公承旨歐陽元公中書左丞許有壬諸先生往還唱和四年轉承事郎

海門縣尹未赴六年遷承直郎南雄路經歷南雄當道  
廣要途送迎供億不勞民而給贊襄平恕政舉藹然十  
年陞翰林修撰奉訓大夫丁內艱家居十二年壬辰紅  
巾盜起州郡望風瓦解六月朝廷遴選守令超試江州  
路總管江州丞李侯黼死節後荆棘莽然十五年乃屯  
楊家湖日畫策為恢復計兵威甚張於是寇不敢犯者  
凡三年十六年正月改除奉議大夫瑞州路總管未赴  
十七年九月陞中順大夫廉訪副使十八年戊戌二月



命始下公去楊家湖道隆興適營國公和尼齊自瑞州  
回省留公議城守公以君命不敢違四月登舟赴廣東  
憲副任五月公持節度闕六月朔日開司南雄九月駐  
車於韶調度無虛日十九年春二月至廣東欽受宣命  
入司禮上夏五月分司募兵屯韶修城池繕兵甲勉勵  
將士恢辦軍儲奉命守韶二十年九月授中憲大夫廣  
東間帥二十二年二月拜嘉議大夫江西參政凡六年  
寇至屢擊卻之民賴以寧二十四年甲辰九月韶洞獠

作亂公分兵討之而贛寇乘間猝至公自將乘城命軍將李如璋率兵力戰一月餘竟以兵少無援而城陷公被執拘囚至贛賊將義公所為幽於慈雲寺惟仲子述侍側公曰吾平生志在忠孝不幸遇執不能報國死不瞑目公書曰生為元朝臣死作元朝鬼忠節既無慙清風自千古公不食六日而卒時十月二十日庚戌也嗚呼公以文學際遇明時躋膺仕膺顯名以行所志及遭世亂備嘗艱險而報國之心死而不渝斯可謂始終克

全矣公生至元庚寅七月六日享年七十有五學者宗之稱為浮雲先生其文章有惟實集若干卷傳於世公性孝友事祖父母父母竭其誠撫弟姪慈而義待宗族以睦接鄉人以恩見世嫻子弟輒勸之學由公而成材者甚衆從伯父季雲得疾體虛憊其子貧公捐資為制剛劑服三日愈後以他疾終公具衾棺以葬宗黨義之邑黃文明等死於燕無所歸公能殯之吉文蘭溪曾氏子燕京驢隨侍父玉輝宦連山其父沒於寇母子流落

公重購求得之以歸公於親友無不盡其情嘗捐資鑿石築陂溉田凡力可為者知無不為父天祐贈中順大夫禮部侍郎上騎都尉彭城郡伯母黃氏贈彭城郡君妻戴氏贈彭城郡君繼鄧氏封同上子男四遂育兄鼎翁子冀州儒學正述國學上舍進為第一翁後早卒運繼之侍公於韶以出戰死女一壻臨川饒伯振孫男六昌符昌裔昌復昌餘昌壽昌泰女三曾孫男一廣孫女二明年乙巳遂述奉公柩歸自贛十二月二十癸酉葬

吉水仁壽鄉東山天柱峯之原公所自卜也先葬徵予誌予於公為母嫺家予少公五歲自童稚為兄弟長以斯文見厚如同氣至老常相聞也宜為誌銘曰其問學該乎六經其行實貫乎日星觀絕筆之數語表忠義於平生前鄉貢進士吉安路永新州儒學正劉玉女撰前鄉貢進士吉安路泰和州儒學正劉于書丹豫章田貴卿鐫石

銘

余讀書山中觀揭文安公浮雲道院記已知劉公為名  
士暨擢第八翰林時楚奇在祕監木天玉署相密通每  
出入必相見楚奇佐郡南雄值壬辰兵變不相聞知歲  
癸巳江西貢士上春官始知楚奇動靜廷論奏為修撰  
改江州守廣東憲赫赫在人耳目噫以楚奇文行之美  
何施不可乃遭迴嶺海以終亦可哀為之詞曰思江之  
山兮崢嶸思江之水兮泓澄久鬱積兮磅礴孕奇秀兮  
士挺生猗先生兮人中之傑泛學海兮士林之英朝發

軻兮津宮夕弭節兮蓬瀛典中秘兮木天陪顧問兮彤  
庭或分符兮統郡或攬轡兮澄清聲華溢兮藩府名姓  
列于御屏咸期公兮還朝將贊化兮鈞衡脩龍蛇兮起  
陸紛豺虎兮縱橫悵關河兮修阻獨持斧兮南征鯨鯢  
奮兮漳江沸頽波激兮砥柱傾望故鄉兮邈悠聊羈棲  
兮賴城嗟舍生兮取義庶不負於忠貞前進士渝陽胡  
行簡泣銘

大參公遺像贊

鶴立昂昂令聞孔彰不知者謂公為埋輪之張綱知公者指公為罵賊之睢陽公雖沒矣如公未亡炯炯丹心至今耿光

先生平生歷仕顯要早繇南雄經歷陞翰林修撰晚自九江筠陽郡守貳憲東廣守韶城遷閩帥拜嘉議大夫江西行省參政紅巾之亂韶城陷公不屈忿悶六日不食而卒距今二十餘年矣公之仲子述以公之遺像及絕筆示予偕書四十六字以表公之志節



云洪武乙丑二月望日前進士安陸州通判同里劉  
虬書

又

貌肅而莊行峻而潔其學問動乎縉紳其聲光振乎閭  
閻其才華足以司帝制其風裁足以持憲節此所以當  
崎嶇末路之際而能奮忠義之遺烈也歟

公之孫希旦以明經領江西鄉薦會試禮部乃以公  
之遺像謁子請言嗟夫子何足以知公雖竭其鄙鈍

亦豈能知公之萬一哉希旦於此惓惓焉請之益勤  
且切可不謂劉氏之賢肩乎而亦可觀公之世澤矣  
遂為之贊而併識其後云永樂五年丁亥冬十一月  
長至日賜進士及第翰林侍講同邑曾榮書

劉楚奇先生贊

蔣環

捧讀惟實儼然劉公篤志聖賢幼學壯行經濟纍纍德  
業轟轟被執不嚙甘作元靈烈烈忠魂千秋炳炳

忠哉忠哉如日在天節毀節歟重若泰山剛峯之友椒

山之前血食崇祀億萬斯年

附  
劉尊元先生贊

令子元帥力能禦寇奮不顧身戰死陣頭英節皎皎忠  
孝縷縷父子香骨億萬春秋追祀加贈永昌厥後

楚奇公遺像贊

裔孫剛

其學博其才長其歷仕也顯其操節也剛炳炳風烈何  
慚常山與睢陽世世廟享不減歐文與忠襄丹青繪來  
精仍燦祇覺一生正氣挾風霜


附尊元公遺像贊

惟公克循父志世篤忠貞衝鋒陷陣義振軍聲粉身碎  
骨光耀日晶想當初勇冠雄嶺昭昭乎事君如事親到  
今日俎豆配享尺幅上仍是血性天真予小子愾乎聞  
儻乎見敢不祇承明禋

予因舊像朽蠹乃請丹青重繪二公遺容以啓後  
人景仰不忘之意

公之父子生元仕元而死節於元雙忠耿耿鴻儒碩士

久矣為公表揚奚待予小子之蟲吟唧唧始發其幽光  
然而鄉賢崇祀至數百載必待予小子請於當事始得  
從事夫烝嘗瞻拜遺像凜凜焉願公俎豆長發其祥



惟實集附錄